

Gisulat ni: Edward Hughes

Gihulagway ni: Lazarus
Alastair Paterson

Gipahaom ni: Ruth Klassen

Gihubad ni: Mel Lorell Abugho,
Cheryn Mabano Abugho

Gipagawas sa: Bible for Children
www.M1914.org

©2023 Bible for Children, Inc.

Pagtugot: Mahimo kang mokopya o mopatik niini
nga estorya, ayaw lang ibaligya.




Usa ka masubo nga adlaw para ka Manases. Ang iyang amahan, si Haring Ezequias bag-o lang namatay. Karon, ang dose ka tuig pa lang, si Manases ang bag-ong hari sa katawhan sa Diyos sa Juda. Wala siya mahibalo niini, apan si Manases mahimong hari sulod sa 55 ka tuig. Gikinahanglan ni Manases ang tabang sa Diyos aron mahimong maayong hari.



Apan si Manases wala magtagad sa Diyos ug nagbuhat ug daotan. Si Manases nagtukod pag-usab ug mga halaran alang sa pagsimba sa mga diosdios. Naghimo pa gani siyag linilok nga larawan ug gibutang kini sa balaang Templo sa Diyos! Ang Dios nag-ingon

pinaagi kang Moises, "Dili ka magbuhat ug bisan unsa nga linilok nga mga larawan. Dili


ka moyukbo kanila ni mag-alagad kanila."



Si Manases nagbuhat ug pagpang-ungo ug pagpamarang. *Gidala niya ang mga tawo palayo sa Dios. Gisunog pa gani sa hari ang iyang mga anak ingong mga halad ngadto sa mga diosdios. Ang pagkadili-masinugtanon ni Manases nakapasuko pag-ayo sa Diyos.*



Sa diha nga ang Iyang mga tawo mosupak na, ang Dios motugot kanila nga silotan. Mao kana ang nahitabo kang Manases ug sa katawhan nga iyang gimandoan. Ang Ginoo nagdala sa kasundalohan sa Asiria diha kanila. Si Manases gidala nga nagkadena ngadto sa Babilonia.




Sa pag-antos didto sa Babilonya, si Manases nangamuyo sa Ginoo nga iyang Diyos. Ug siya nagpaubos sa iyang kaugalingon sa hilabihan gayud sa atubangan sa Dios sa iyang mga amahan, ug nag-ampo kaniya. Dili na ako mag-ampo sa patay nga mga idolo! Apan, tubagon ba sa buhing Diyos si Manases human sa tanan niyang pagkadaotan?




Oo! *Gidungog* sa Dios ang pag-ampo sa hari ug gipabalik siya sa Jerusalem, balik sa trono, balik sa pagkahari sa katawhan. Unya si Manases nakahibaw nga ang Ginoo mao ang Dios.



Si Haring Manases usa na ka bag-ong tawo. Gikuha niya ang larawan gikan sa templo sa Diyos ug gitigom ang tanang langyaw nga mga diyos sa Jerusalem. Iyang gilabay silang tanan. Giayo niya ang halaran sa Ginoo ug naghalad ug mga halad sa pagpasalamat.



Unya iyang gisugo ang iyang katawhan sa
pag-alagad sa Ginoo, ang Dios sa Israel.
Pagkadakong kausaban sa Manases!




Sa dihang namatay si Manases, ang iyang kaugalingong anak na lalaki, si Amon, mibalik sa pagsimbag idolo. Apan wala siya magpaubos sa iyang kaugalingon atubangan sa Ginoo sama kang Manases. Samtang nagadugang ang pagpakasala ni Amon, gpatay siya sa iyang mga alagad, sa iya kaugalingon nga balay. Duha lang ka tuig ang iyang pagkahari.




Ang sunod nga hari, si Josias, otso anyos pa lang. Naghari siya sulod sa 31 ka tuig ug gibuhat niya ang matarong sa panan-aw sa Diyos. Iyang giguba ang tanang bakak nga pagsimba ug tanang bakak nga mga diyos. Sa pagkatinuod, gigaling ni Josias ang tanang mga idolo ngadto sa pulbos.



Ang maayong hari nga si Josias usab naghinlo ug nag-ayo sa Templo sa Dios. Diha sa mga basura nakita sa usa ka pari ang Libro sa Balaod sa Ginoo nga gihatag pinaagi ni Moises.



Sa pagkadungog sa hari sa mga pulong sa Balaod, gigisi niya ang iyang sapot sa kasubo. Nasayod si Josias kon unsa ka daotan ang iyang mga katigulangan sa pagsupak sa balaod sa Diyos.




Ang usa ka propetisa nga ginganlag Hulda mihatag sa mensahe sa Diyos kang Josias. "Mao kini ang giingon sa Ginoo, 'Tan-awa, dad-on ko ang tanang tunglo nga anaa sa basahon nganhi niining dapita tungod kay sila mibiya kanako.'" Apan tungod kay si Josias mapainubsanon ug masinugtanon,


kini dili mahitabo hangtud nga siya namatay na.



Gitabangan sa Diyos si Josias sa paggiya sa iyang katawhan balik sa Ginoo. Usa ka adlaw niana, samtang nanguna sa iyang kasundalohan sa gubat, si Josias grabeng nasamdan sa usa ka kaaway nga magpapana. Gidala siya sa iyang mga sulugoon sa iyang balay sakay sa usa ka karwahe ngadto sa Jerusalem diin siya namatay. Ang tanan niyang katawhan nagbangotan, ug naghimog mga awit mahitungod sa

maayong Hari nga si Josias.





Sa wala madugay human niana, ang gingharian natapos. Apan sa umaabot, usa ka hari ang maghari pag-usab sa Israel.

Ang iyang ngalan HARI SA MGA HARI, UG GINOO SA MGA GINOO. Sa dihang si Jesukristo mianhi sa unang higayon, Siya gisalikway ug gilansang sa krus. Sa diha nga si Jesukristo moanhi pag-usab, Siya dili lamang mahimong hari sa Israel, kon dili sa tibuok yuta.



Maayong mga Hari, Daotan nga mga Hari
Estorya gikan sa Pulong sa Dios, ang Biblia,
makita sa
2 Cronicas 33-36

"Ang pag-abot sa Imong mga Pulong
nagahatag og kahayag." Salmo 119:130





Ang Kataposan

Kini nga estorya gikan sa Biblia nagasulti kanato bahin sa kahibulongan nga Dios nga nagbuhat kanato ug gusto Niya nga kita makaila Kaniya.

Nahibalo ang Dios nga nakabuhat kitag daghang daotan. Gitawag Niya kini nga sala. Kamatayon ang silot sa sala. Pero nahigugma pag-ayo ang Dios kanato. Iyang gipadala ang bugtong Niyang Anak nga si Jesus aron mamatay sa Krus ug silotan tungod sa imong mga sala. Unya nabanhaw si Jesus ug mibalik sa Langit! Kon motuo ka kang Jesus ug mohangyo nga pasayloon ka sa imong mga sala, himoon kana Niya! Moanha Siya ug mopuyo sulod kanimo karon, ug mopuyo ka uban Kaniya hangtod sa kahangtoran.

Kon motuo ka nga kini ang tinuod, ingna ang Dios:
Ginoong Jesus, ako nagatuo nga Ikaw Dios, ug nahimong tawo aron mamatay alang sa akong mga sala, ug karon Ikaw nabuhi pag-usab.

Anhi sa akong kinabuhi ug pasayloa ang akong mga sala, aron mabag-o ang akong kinabuhi karon, ug unya makig-uban ako Kanimo hangtod sa kahangtoran. Tabangi ako nga motuman Kanimo ug magkinabuhi alang Kanimo ingon nga Imong anak. Amen.

Basaha ang Biblia ug pakigsulti sa Dios kada adlaw! Juan 3:16

